

समै – 12:25 hrs.

<><><><><><>

ISRO-Spadex

भारतीय अंतरिक्ष अनुसंधान संगठन-इसरो नै अपने स्पेडैक्स मिशन तैहत डॉकिंग दी प्रक्रिया अज्ज मुकम्मल करी लैती ऐ। राष्ट्रपति द्रौपदी मुर्मू ते प्रधानमंत्री नरेंद्र मोदी होरें एहदे पर इसरो दे साइंसदानें ते कन्नै इसरो च कम्म करने आहले सब्भनैं सदस्यें गी उपग्रहें दे अंतरिक्ष च सुरक्षित डॉकिंग च कामयाबी लेई ममारकबाद दिती ऐ। इक सोशल मीडिया पोस्ट च मोदी होरें आखेआ ऐ जे भारत दे भविष्य लेई अंतरिक्ष कार्यक्रमें च एह उपलब्धि इक मील दा पत्थर साबत होग। राष्ट्रपति द्रौपदी मुर्मू ते होरें बी इस ऐतिहासिक कामयाबी पर इसरो दे वैज्ञानिकें दी सराहना करदे होई उनेंगी भविष्य लेई शुभकामना दितियां न। तोआई, विज्ञान ते टेक्नॉलॉजी मंत्री डॉ. जतिंद्र सिंह होरें इस उपलब्धि पर खुशी प्रगट करदे होई आखेआ ऐ जे स्हाड़े साइंसदानें ओह करी दस्सेआ ऐ जेदा कुसै नै सोचे दा बी नेही हा। उनें आखेआ जे अंतरिक्ष च उपग्रहें दी डॉकिंग आहला एह पूरा सरिस्ता पूरी चाल्ली भारतीय ऐ जेड़ा अंतरिक्ष खेतर च भारत दिए नित नमिएं उपलब्धिं च इक महत्वपूर्ण थाहर रखदा ऐ। उनें आखेआ जे इस उपलब्धि नै स्हाड़े भविष्य दे अंतरिक्ष मिशनें जिंदे च भारतीय अंतरिक्ष स्टेशन, चंद्रयान-4 ते गगनयान बी शामिल न, लेई बवस्था ते रमानदारी आहले ढंगै सिर तोड़ चढ़ने लेई बत पदरी करीद दिती ऐ।

<><><><><><>

Rajouri

जंदी रातीं जम्मू दे सरकारी मेडिकल कॉलज च इक्क होर बच्चे दी मौत दे कन्नै गै राजौरी च सामने आई दी अंजान बमारी कारण मरने आहलें दी गिनतरी 15 होई गई ऐ। इस मामले तफसीली जांच लेई विशेष जांच टीम दा गठन कीता गेआ ऐ जेड़ी राजौरी जिले दे बडाल इलाके च पिछले 45ं दिनें दौरान लोकें दी संदिग्ध मौत आहले मामले दी जांच करोग। इस बारे सेहत मंत्री सकीना इतू होरें आखेआ ऐ जे जांच दा कम्म जारी ऐ ते तौलें गै इनें घटनाएं दी असल वजह दा पता लाई लैता जाग। उनें लोकें गी अपील कीती ऐ जे ओह घाबरन नई।

<><><><><><>

MoS-Jatinder Singh

केंद्री मंत्री डॉ. जतिंद्र सिंह होरें कीनिया दे वरिष्ठ लोक सेवकें कन्नै गल्लबात कीती ऐ जेहड़े अटार्नी जनरल डोरकास एगिक अबुया ओडुअर हुंदी अगुवाई च उनेंगी मिले। किट्ठै गी संबोधित करदे होई उनें आखेआ जे ब्रिटिश उपनिवेश शासन दे तैहत सांझे तजुर्बे दे कारण भारत ते कीनिया बश्कार ऐतिहासिक सरबंधें दा असर राजनीतिक ते प्रशासनिक ढांचे उप्पर पेआ ऐ। डॉ. सिंह होरें आखेआ जे दवें मुख्य लोकतांत्रिक सिद्धांतें, पारदर्शिता ते सुशासन यकीनी बनाने लेई बचनबद्ध न। उनें समुंद्री चुनौतियें ते पर्यावरण सरबन्धी बक्ख-बक्ख समस्याएं दा बी जिक्र कीता ते इन्दे पूरे-पराते नबेड़े लेई मीलियै कम्म करने पर जोर पाया।

<><><><><><>

R D Parade Review

सिविल ते पुलस प्रशासन दे सीनियर अधिकारियें जम्मू दे मोलाना आजाद स्टेडियम च चला करदी गणतंत्र दिवस दी तैयारियें दा निरीक्षण कीता। जम्मू दे डिविजनल कमिशनर रमेश कुमार ते ते ए.डी.जी.पी आनन्द जैन होरें बक्ख-बक्ख मैहकमें आसेआ कीते गेदे प्रबंधें दा जायजा लैता जेदे च सुरक्षा बंदोबस्त, ट्रैफिक प्रबंधन, लोकें दे बौहने लेई इंतजाम, साज-सजावट, साफ-सफाई, बिजली ते पानी दी बवस्था, गड्डियां खड़ेरने लेई थाह, औने आहले लोकें दी जांच ते अगग लग्गने जां कुसै होर माड़ी घटना दी सूरतै च कीती जाने आहली तैयारियां शामिल ही। सरबन्धित अधिकारिएं गणतंत्र दिवस समारोह दी रिहर्सल जम्मू दे मोलाना आजाद स्टेडियम च चला करदी ऐ जेदे च थेआरबंद बल, स्कूली बच्चे बैड दस्ते ते सांस्कृतिक कार्यक्रमें आहलियां टोलियां हिस्सा लै करदियां न।

<><><><><><>

Announcement

आकाशवाणी जम्मू दे खेत्तरीय समाचार एकांश आसेआ कठुआ जिले लेई अंशकालिक संवाददाता लेई दरखास्तां मंगियां गेइयां न। इच्छुक आवेदक जेदी उमर 24 थवां 50 बरें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां गैजुएशन ते

पत्रकारिता च 2 बरें दा अनुभव होना लोड़चदा। मेदवार गी कम्प्यूटर खबर बनाने, मीडिया कवरेज दा अनुभव सने सरबंधी लोड़चदे उपकरण दा इस्तेमाल बी करना आना चाइदा। आवेदक जिला सदर दफ्तर दी 10 किलोमीटर दी हद दे अंदर-अंदर रोहंदा होना चाइद। दरखास्त ते लोड़चदे दस्तावेज दी कॉपी मेदवार गी खेत्तरीय समाचार एकांश आकाशवाणी पंजतीर्थी जम्मू पिन कोड 180001 पर 15 फरवरी 2025 थवां पैहले-पैहले आइए जमा करोआनी होग। इस बारे व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

PM-Mann ki Baat

प्रधानमंत्री नरेंद्र मोदी होर म्हीने च इक बारी प्रसारित होने आहले अपने रेडियो कार्यक्रम मन की बात राएं इस बारी 19 जनवरी गी अपने विचार देश विदेश च रोहने आहले श्रोताएं कन्ने सांझे करंगन। उआं ते एह प्रोग्राम म्हीने दे खीरी ऐतवार बड्डलै 11 बजे प्रसारित होंदा ऐ पर ऐकती खीरी ऐतवार 26 जनवरी होने कारण एहदा प्रसारण इक हफ्ता पैहले कीता जा रदा ऐ। एह इस कार्यक्रम दी 118मीं किश्त होग। इस कार्यक्रम च शामिल करने लेई अपने सुझा 17 जनवरी तगर भेजी सकदे न। श्रोता अपने सुझा टोल फ्री नंबर 1800-11-7800 पर जां फ्ही नरेंद्र मोदी ऐप जां माई गोव ओपन फोरम पर बी भेजी सकदे न।

<><><><><><>

Kishtwar-Inspection

किश्तवाड़ च बाल मजदूरी दी कवैतू गी खत्म करने लेई जिला कार्जबल नै कस्बे दे बक्ख-बक्ख बजारें च चक्कर लाइयै बच्चें आसेआ कम्म करोआने दे मामलें दा पता लोआने लेई व्यापक सर्वेक्षण कीता। जिला विकास कमिशनर राजेश कुमार शवन हुंदे निर्देशें ते जिला नोडल अफसर ते असिस्टेंट लेबर कमिशनर ममता सुदर्शन हुंदी दिक्ख-रिक्ख च इस टीम नै हट्टिएं-दकानें ते होरनें कारोबारी इदारें च जाइयै जांच कीती ते दिक्खेआ जे कुदरै बी बच्चें ते किशोरें दे अधिकारें सरबंधी 1986 आहले कनून दी खलाफवर्जी नेई होआ करदी।

<><><><><><>